

Համարը N 737-Ն	Տեսակը Ինկորպորացիա
Տիպը Որոշում	Կարգավիճակը Գործում է
Սկզբնաղբյուրը ՀՀՊՏ 09.07.03./36(271)	Ընդունման վայրը Երևան
Հոդ.647	
Ընդունող մարմինը ՀՀ կառավարություն	Ընդունման ամսաթիվը 02.05.2003
Ստորագրող մարմինը ՀՀ Վարչապետ	Ստորագրման ամսաթիվը 20.06.2003
Վավերացնող մարմինը ՀՀ Նախագահ	Վավերացման ամսաթիվը 24.06.2003
Ուժի մեջ մտնելու ամսաթիվը 19.07.2003	Ուժը կորցնելու ամսաթիվը

Մայր փաստաթուղթ: <a href="#">ՀՀ ԿԱՌԱՎԱՐՈՒԹՅԱՆ ՈՐՈՇՈՒՄԸ ՀՀ ՖԻՆԱՆՍԵՐԻ ...</a>	
Մայր փաստաթղթին փոփոխող փաստաթղթերը`	Համապատասխան ինկորպորացիան`
<a href="#">ՀՀ ԿԱՌԱՎԱՐՈՒԹՅԱՆ ՈՐՈՇՈՒՄԸ ՀՀ Կ ...</a> (05.06.2008 - )	ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՖԻՆԱՆ ... (05.06.2008 - )

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՖԻՆԱՆՍԵՐԻ ՆԱԽԱՐԱՐՈՒԹՅԱՆ «ԹԱՆԿԱՐԺԵՔ ՄԵՏԱՂՆԵՐԻ ԵՎ ԹԱՆԿԱՐԺԵՔ ՔԱՐԵՐԻ ՊԵՏԱԿԱՆ ԳԱՆՁԱՐԱՆ» ԳՈՐԾԱԿԱԼՈՒԹՅԱՆ ԿԱՆՈՆԱԴՐՈՒԹՅՈՒՆՆ ՈՒ ԿԱՌՈՒՑՎԱԾՔԸ ՀԱՍՏԱՏԵԼՈՒ ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 1992 ԹՎԱԿԱՆԻ ՄԱՐՏԻ 19-Ի N 163 ՈՐՈՇՈՒՄՆ ՈՒԺԸ ԿՈՐՑՐԱԾ ՃԱՆԱՉԵԼՈՒ ՄԱՍԻՆ

«Վավերացնում եմ»  
 Հայաստանի Հանրապետության  
 Նախագահ Ռ. Քոչարյան  
 24 հունիսի 2003 թ.

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ**  
**Ո Ր Ո Շ ՈՒ Մ**

2 մայիսի 2003 թվականի N 737-Ն

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՖԻՆԱՆՍԵՐԻ ՆԱԽԱՐԱՐՈՒԹՅԱՆ «ԹԱՆԿԱՐԺԵՔ ՄԵՏԱՂՆԵՐԻ ԵՎ ԹԱՆԿԱՐԺԵՔ ՔԱՐԵՐԻ ՊԵՏԱԿԱՆ ԳԱՆՁԱՐԱՆ» ԳՈՐԾԱԿԱԼՈՒԹՅԱՆ ԿԱՆՈՆԱԴՐՈՒԹՅՈՒՆՆ ՈՒ ԿԱՌՈՒՑՎԱԾՔԸ ՀԱՍՏԱՏԵԼՈՒ ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 1992 ԹՎԱԿԱՆԻ ՄԱՐՏԻ 19-Ի N 163 ՈՐՈՇՈՒՄՆ ՈՒԺԸ ԿՈՐՑՐԱԾ ՃԱՆԱՉԵԼՈՒ ՄԱՍԻՆ**  
**(Վերնագիրը փոփ. 15.05.08 N 499- Ն)**

«Պետական կառավարչական հիմնարկների մասին» Հայաստանի Հանրապետության օրենքի 9-րդ հոդվածի 2-րդ ու 3-րդ և 11-րդ հոդվածի 1-ին մասերին, ինչպես նաև Հայաստանի Հանրապետության Նախագահի 2002 թվականի մարտի 16-ի ՆՀ-1064 հրամանագրով սահմանված

կարգի 4-րդ կետին համապատասխան՝ Հայաստանի Հանրապետության կառավարությունը **որոշում է**

1. Հաստատել՝

ա) Հայաստանի Հանրապետության ֆինանսների նախարարության «Թանկարժեք մետաղների և թանկարժեք քարերի պետական գանձարան» գործակալությունը՝ համաձայն N 1 հավելվածի.

(«ա» ենթակետը փոփ. 15.05.08 N 499- Ն)

բ) Հայաստանի Հանրապետության ֆինանսների նախարարության «Թանկարժեք մետաղների և թանկարժեք քարերի պետական գանձարան» գործակալության կառուցվածքը՝ համաձայն N 2 հավելվածի:

(«բ» ենթակետը փոփ. 15.05.08 N 499- Ն)

2. Ուժը կորցրած ճանաչել Հայաստանի Հանրապետության կառավարության 1992 թվականի մարտի 19-ի «Թանկարժեք մետաղների, քարերի և դրանցից պատրաստված իրերի պահպանության պետական գանձարանի կանոնադրությունը հաստատելու մասին» N 163 որոշումը:

3. Մույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը:

**Հայաստանի Հանրապետության  
վարչապետ**

**Ա. Մարգարյան**

2003 թ. հունիսի 20  
Երևան

Հավելված N 1  
ՀՀ կառավարության 2003 թվականի  
մայիսի 2-ի N 737-Ն որոշման

**Կ Ա Ն Ո Ն Ա Դ Ր ՈՒ Թ Յ ՈՒ Ն**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՖԻՆԱՆՍՆԵՐԻ ՆԱԽԱՐԱՐՈՒԹՅԱՆ «ԹԱՆԿԱՐԺԵՔ  
ՄԵՏԱՂՆԵՐԻ ԵՎ ԹԱՆԿԱՐԺԵՔ ՔԱՐԵՐԻ ՊԵՏԱԿԱՆ ԳԱՆԶԱՐԱՆ» ԳՈՐԾԱԿԱԼՈՒԹՅԱՆ  
(Վերնագիրը փոփ. 15.05.08 N 499- Ն)**

**I. ԸՆԴՀԱՆՈՒՐ ԴՐՈՒՅԹՆԵՐ**

1. Հայաստանի Հանրապետության ֆինանսների նախարարության «Թանկարժեք մետաղների և թանկարժեք քարերի պետական գանձարան» գործակալությունը (այսուհետ՝ գործակալություն) Հայաստանի Հանրապետության ֆինանսների և էկոնոմիկայի նախարարության կազմում գործող Հայաստանի Հանրապետության գործադիր իշխանության հանրապետական մարմին է, որն օրենքով, իսկ առանձին դեպքերում՝ նաև Հայաստանի Հանրապետության օրենսդրությամբ նախատեսված դեպքերում մատուցում է ծառայություններ թանկարժեք մետաղների, թանկարժեք քարերի և դրանցից պատրաստված իրերի պետական պահուստների ձևավորման, համալրման և կառավարման բնագավառում՝ հանդես գալով Հայաստանի Հանրապետության անունից:

(I-ին կետը փոփ. 15.05.08 N 499- Ն)

2. Գործակալությունն ստեղծվում, վերակազմակերպվում է, և նրա գործունեությունը դադարեցվում է Հայաստանի Հանրապետության կառավարության որոշմամբ: Գործակալությունը գործում է սույն կանոնադրության համաձայն, որը, Հայաստանի Հանրապետության ֆինանսների նախարարի (այսուհետ՝ նախարար) ներկայացմամբ, հաստատում է Հայաստանի Հանրապետության կառավարությունը:

**(2-րդ կետը փոփ. 15.05.08 N 499-Ն)**

3. Գործակալության լիազորությունները սահմանվում են օրենքով, Հայաստանի Հանրապետության Նախագահի հրամանագրերով, կարգադրություններով, Հայաստանի Հանրապետության կառավարության որոշումներով, նախարարի հրամաններով, ինչպես նաև Հայաստանի Հանրապետության միջազգային պայմանագրերով:

4. Գործակալությունն իր գործունեությունն իրականացնում է Հայաստանի Հանրապետության օրենսդրությանը և այլ իրավական ակտերին համապատասխան:

5. Գործակալությունն օրենքով կամ այլ իրավական ակտերով նախատեսված դեպքերում իրավունք ունի Հայաստանի Հանրապետության անունից ձեռք բերելու և իրականացնելու գույքային ու անձնական ոչ գույքային իրավունքներ, կրելու պարտականություններ, դատարանում հանդես գալու որպես հայցվոր կամ պատասխանող:

6. Գործակալությունն ունի Հայաստանի Հանրապետության զինանշանի պատկերով ու գործակալության հայերեն անվանմամբ կլոր կնիք, ձևաթղթեր, խորհրդանիշ և այլ անհատականացման միջոցներ:

## **II. ԳՈՐԾԱԿԱԼՈՒԹՅԱՆ ՆՊԱՏԱԿՆԵՐԸ ԵՎ ԽՆԴԻՐՆԵՐԸ**

7. Գործակալության նպատակները և խնդիրներն են՝

ա) Հայաստանի Հանրապետության արտադրական, ֆինանսական, գիտական, մշակութային, ներդրումային ու այլ կարիքների բավարարման նպատակով թանկարժեք մետաղների և թանկարժեք քարերի պետական պահուստների ձևավորման, համալրման, պահպանության, տեղաբաշխման ու ծախսման ապահովումը: Պետական սեփականություն հանդիսացող բոլոր թանկարժեք մետաղների և թանկարժեք քարերի (ցանկացած տեսքով և վիճակում)՝ պետական պահուստներում միասնական հաշվառման ու հաշվեգրման ապահովումը.

բ) թանկարժեք մետաղների և թանկարժեք քարերի արդյունահանման, արտադրության, օգտագործման, շրջանառության, տեղաբաշխման և պահպանության բնագավառում գիտության ու տեխնիկայի նորագույն նվաճումների և առաջատար փորձի արմատավորման ապահովումը:

Հայրենական արտադրանքի համար նոր շուկաների յուրացման նպատակով գործադիր իշխանության այլ մարմինների հետ համատեղ մեթոդական և տեղեկատվական աջակցության ապահովումը.

գ) Հայաստանի Հանրապետության կառավարության կողմից հաստատված տեսակների, անվանացանկի ու ծավալների համաձայն թանկարժեք մետաղների և թանկարժեք քարերի պետական պահուստների կուտակման ծրագրերի կատարումը, այդ արժեքների պահպանման, ցուցադրման, վերամշակման, զտման, մետաղական հաշիվներում տեղաբաշխման և կառավարման գործառնությունների իրականացումը:

## **III. ԳՈՐԾԱԿԱԼՈՒԹՅԱՆ ԳՈՐԾԱՌՈՒՅԹՆԵՐԸ**

8. Գործակալությունն իր նպատակների և խնդիրների իրականացման համար Հայաստանի Հանրապետության օրենսդրությամբ սահմանված կարգով իրականացնում է հետևյալ գործառույթները՝

ա) շահագրգիռ պետական մարմինների հետ համատեղ՝ օրենքով սահմանված տեսակների թանկարժեք մետաղների և թանկարժեք քարերի, ինչպես նաև դրանցից պատրաստված իրերի պետական պահուստներում կուտակման ծավալների գիտականորեն հիմնավորված չափորոշիչների մշակում ու դրանք Հայաստանի Հանրապետության ֆինանսների նախարարության (այսուհետ՝ նախարարություն) միջոցով Հայաստանի Հանրապետության կառավարության հաստատմանը ներկայացնելը.

*(«ա» ենթակետը փոփ. 15.05.08 N 499- Ն)*

բ) հաշվի առնելով թանկարժեք մետաղների, թանկարժեք քարերի և դրանցից պատրաստված իրերի կուտակման, բացթողման, դատական մարմինների վճիռների համաձայն տերերին վերադարձման, վերամշակման, գտման (աֆինաժի), մետաղական հաշիվներում տեղաբաշխման ծավալները՝ թանկարժեք մետաղների և թանկարժեք քարերի պետական պահուստների ձևավորման ու համալրման հեռանկարային ու տարեկան ծրագրերի նախագծերի մշակում և դրանք նախարարության միջոցով Հայաստանի Հանրապետության կառավարության հաստատմանը ներկայացնելը.

գ) պետական պահուստներում կուտակելու նպատակով ներքին և արտաքին շուկաներից թանկարժեք մետաղների, թանկարժեք քարերի ու դրանցից պատրաստված իրերի ձեռքբերում, դրանց կուտակման գծով ծախսերի ֆինանսավորման ապահովում և տվյալ տարում դրանց համար վճարումների իրականացում՝ Հայաստանի Հանրապետության պետական բյուջեով նախատեսված միջոցներին համապատասխան՝ ստացված արժեքները մուտքագրելով պետական պահուստներ.

դ) Հայաստանի Հանրապետության օրենսդրության համաձայն բռնագանձված, բռնագրավված, հօգուտ պետությանը տիրագուրկ ճանաչված, ռեկվիզիցիայի կարգով, ժառանգության իրավունքով, նվիրատվությամբ ու այլ հիմքերով պետությանն անցած թանկարժեք մետաղների, թանկարժեք քարերի և դրանցից պատրաստված իրերի, ինչպես նաև այդպիսի իրերի ջարդոնի՝ պետական պահուստներ մուտքագրման ապահովում.

ե) Հայաստանի Հանրապետության կառավարության կողմից սահմանված կարգով և չափով թանկարժեք մետաղների, թանկարժեք քարերի և դրանցից պատրաստված իրերի՝ պետական պահուստներից բացթողում, բաց թողնված արժեքների դիմաց վճարումների գանձում և Հայաստանի Հանրապետության պետական բյուջեի եկամտային մաս մուտքագրում: Նախարարության միջոցով յուրաքանչյուր ֆինանսական տարվա ընթացքում թանկարժեք մետաղների և թանկարժեք քարերի պետական պահուստների համալրման ու ծախսման մասին Հայաստանի Հանրապետության կառավարություն հաշվետվություն ներկայացնելը.

զ) Հայաստանի Հանրապետության կառավարության կողմից սահմանված կարգով՝ պետական սեփականություն հանդիսացող թանկարժեք մետաղների, թանկարժեք քարերի և դրանցից պատրաստված իրերի պետական պահուստներում հաշվեգրման և միասնական հաշվառման ապահովում, դրանց առկայության և շարժի ամփոփ հաշվառում.

է) թանկարժեք մետաղների և թանկարժեք քարերի պետական պահուստներում հաշվեգրված արժեքները տնօրինող, տիրապետող ու օգտագործող պետական հիմնարկներից իրենց կողմից օգտագործվող պետական պահուստների նյութական արժեքների առկայության, շարժի, որակական վիճակի, գույքագրումների և պահպանման պայմանների մասին փաստաթղթային տվյալներ

ներկայացնել պահանջելը.

ը) գործադիր իշխանության մարմիններից իր կանոնադրական խնդիրների կատարման համար անհրաժեշտ համապատասխան տեղեկատվության և տվյալների պահանջում և ստացում.

թ) նախարարության միջոցով՝ մասնավորեցման ենթակա կամ սնանկացման գործընթացում գտնվող պետական կամ պետական բաժնեմաս ունեցող կազմակերպությունների գույքի կազմում առկա թանկարժեք մետաղների և թանկարժեք քարերի գնահատման ու սեփականության իրավունքի փոխանցման նպատակահարմարության վերաբերյալ Հայաստանի Հանրապետության կառավարություն առաջարկություններ ներկայացնելը.

ժ) Հայաստանի Հանրապետության կառավարության կողմից սահմանված կարգով՝ պետական սեփականություն հանդիսացող թանկարժեք մետաղների և թանկարժեք քարերի բացթողման, ինչպես նաև պետական պահուստները համալրելու նպատակով թանկարժեք մետաղների ու թանկարժեք քարերի գնման գների հաստատում.

ժա) Հայաստանի Հանրապետության կառավարության որոշումների համաձայն թանկարժեք մետաղների և թանկարժեք քարերի գները հրապարակելը և իրավասու պետական մարմիններ ներկայացնելը՝ այդ մետաղների և քարերի օգտակար հանածոների արդյունահանված պաշարների համար բնօգտագործման վճարները հաշվարկելու, ինչպես նաև մասնավորեցվող կամ սնանկացման գործընթացում գտնվող պետական կամ պետական բաժնեմաս ունեցող կազմակերպությունների գույքի կազմում առկա թանկարժեք մետաղներն ու թանկարժեք քարերը գնահատելու նպատակով.

ժբ) օրենքով սահմանված կարգով Հայաստանի Հանրապետության սեփականություն հանդիսացող՝ պետական հիմնարկների հաշվեկշռում գտնվող թանկարժեք մետաղների և թանկարժեք քարերի միասնական հաշվառում՝ բացառությամբ Հայաստանի Հանրապետության կենտրոնական բանկի պահուստներում գտնվող արժեքների, այդ արժեքների իրացման գների, շահագործման կորուստների ու վերագնահատման արդյունքների վերաբերյալ համաձայնություն տալը՝ հիմք ընդունելով դրանց ներկայացվող՝ իրավական ակտերով սահմանված պահանջները և չափորոշիչները.

ժգ) թանկարժեք մետաղների և թանկարժեք քարերի հանքահետախուզության, արդյունահանման, արտադրության, օգտագործման և շրջանառության բնագավառում պետական ներդրումային քաղաքականության մշակմանը մասնակցություն.

ժդ) թանկարժեք մետաղների և թանկարժեք քարերի շուկայի պետական կարգավորման, ինչպես նաև թանկարժեք մետաղների և քարերի պետական պահուստների արդյունավետ կառավարման վերաբերյալ նորմատիվ իրավական ակտերի և մեթոդական փաստաթղթերի նախագծերի մշակմանը մասնակցություն.

ժե) պետական հիմնարկներից ու կազմակերպություններից գույքի վերանորոգումից, դուրսգրումից և օտարումից զոյացած թանկարժեք մետաղների ջարդոնի ու թափոնի ընդունում, դրանց վերամշակման, գտման կազմակերպում և արտադրված թանկարժեք մետաղների՝ Հայաստանի Հանրապետության պետական պահուստներում հաշվեգրում.

ժզ) վերամշակման, վերանորոգման և գտման (աֆինաժի) մասին կնքված պայմանագրերի համաձայն վերամշակող, վերանորոգող ու գտող կազմակերպություններ գտված և ոչ կոնդիցիոն թանկարժեք մետաղների, թանկարժեք մետաղներից ու թանկարժեք քարերից պատրաստված իրերի և նյութերի, թանկարժեք մետաղների ջարդոնի և թափոնի առաքում.

ժէ) օրենքով սահմանված կարգով բնակչությունից թանկարժեք մետաղների, ինչպես նաև դրանցից պատրաստված իրերի ջարդոնների, թանկարժեք մետաղների ու թանկարժեք քարերի

հազվագյուտ բնակտորների, թանկարժեք մետաղներից և թանկարժեք քարերից պատրաստված բարձր գեղարվեստական և պատմամշակութային արժեք ներկայացնող իրերի գնումների կազմակերպում և իրականացում՝ դրանք մուտքագրելով պետական պահուստներում:

ժը) Հայաստանի Հանրապետության կառավարության կողմից սահմանված կարգով պետական պաշտոնատար անձանց կողմից պաշտոնի բերումով ստացված թանկարժեք նվերների՝ պետական պահուստներում մուտքագրումը և (կամ) հաշվառումն ապահովելը:

ժթ) իր կողմից ժամանակավորապես ի պահ ընդունված թանկարժեք մետաղների, թանկարժեք քարերի և դրանցից պատրաստված իրերի՝ տերերին վերադարձման ապահովում՝ դատական մարմինների վճիռների համաձայն:

ի) պետական պահուստներում մուտքագրված արժեքների ամենամյա գույքագրում, հաշվառում, այդ թվում՝ պետական պահուստներում հաշվեգրված և այլ սուբյեկտների հաշվեկշռում գտնվող արժեքների ամփոփ հաշվառում:

իա) գիտնականներից և համապատասխան կազմակերպությունների ու հիմնարկների մասնագետներից և ղեկավարներից կազմված խորհրդատվական ու փորձագիտական խորհուրդների և հանձնաժողովների ստեղծում՝ պետական պահուստները համալրելու նպատակով ձեռք բերվող հազվագյուտ, պատմամշակութային և բարձր գեղարվեստական արժեք ունեցող թանկարժեք մետաղները, թանկարժեք քարերը և դրանցից պատրաստված իրերը Հայաստանի Հանրապետության կառավարության կողմից սահմանված կարգով փորձաքննության ենթարկելու և գնահատելու համար:

իբ) պետական պահուստներում գտնվող թանկարժեք մետաղներից ու թանկարժեք քարերից պատրաստված մշակութային և բարձր գեղարվեստական արժեք ունեցող իրերի ցուցադրության կազմակերպում, Հայաստանի Հանրապետությունում և այլ երկրներում կազմակերպվող ոսկերչական իրերի ցուցահանդես-վաճառքներին մասնակցություն:

իգ) թանկարժեք մետաղների ու թանկարժեք քարերի արդյունավետ օգտագործման և տնտեսման ուղղությամբ տարվող գիտահետազոտական ու փորձարարական աշխատանքներին և ստանդարտների մշակմանը, գիտության ու տեխնիկայի նորագույն նվաճումների և համաշխարհային առաջավոր փորձի արմատավորմանը մասնակցություն:

իդ) թանկարժեք քարերի դասակարգման, տեսակավորման, մշակման, փորձաքննության ու գնահատման համաշխարհային և հայրենական առաջավոր փորձի ուսումնասիրում ու ներդրում, այդ թվում՝ թանկարժեք քարերի գնահատման միասնական ստուգանմունքների պահպանում և կիրառում ու կադրերի վերապատրաստման կազմակերպում:

իե) թանկարժեք մետաղների ու թանկարժեք քարերի ներքին ու արտաքին շուկաների իրավիճակի ուսումնասիրում՝ պետական պահուստներն արդյունավետ կառավարելու նպատակով:

իզ) Հայաստանի Հանրապետության անունից օտարերկրյա պետությունների ու իրավաբանական անձանց միջև թանկարժեք մետաղների և թանկարժեք քարերի հանքահետախուզման, արդյունահանման, արտադրության, օգտագործման ու շրջանառության բնագավառում կնքվող պայմանագրերի տնտեսաիրավական փորձաքննության կատարմանը մասնակցություն:

իէ) Հայաստանի Հանրապետության օրենսդրությամբ գործակալությանը վերապահված այլ խնդիրների և գործառույթների իրականացում:

#### **IV. ԳՈՐԾԱԿԱԼՈՒԹՅԱՆ ԿԱՌԱՎԱՐՈՒՄԸ**

9. Գործակալությունը կառավարում է նախարարը: Գործակալության անմիջական ղեկավարումն

իրականացնում է գործակալության պետը, որը պաշտոնի նշանակվում և պաշտոնից ազատվում է Հայաստանի Հանրապետության օրենսդրությամբ սահմանված կարգով:

Իր գործունեության ընթացքում գործակալության պետն առաջնորդվում է Հայաստանի Հանրապետության Սահմանադրությամբ, Հայաստանի Հանրապետության օրենքներով, նախարարության կանոնադրությամբ և սույն կանոնադրությամբ, ինչպես նաև այլ իրավական ակտերով ու Հայաստանի Հանրապետության միջազգային պայմանագրերով:

10. Գործակալության պետը պատասխանատու է գործակալության առջև դրված խնդիրների ու գործառույթների բնագավառում մատուցվող ծառայությունների որակի, ինչպես նաև դրանց՝ օրենքներին և այլ իրավական ակտերին համապատասխանության համար:

11. Գործակալության պետը հաշվետու է Հայաստանի Հանրապետության վարչապետին, նախարարին և գործակալության գործունեությունը համակարգող նախարարի համապատասխան տեղակալին, իսկ քաղաքացիական ծառայության մասին Հայաստանի Հանրապետության օրենսդրությամբ նախատեսված դեպքերում՝ նաև նախարարության աշխատակազմի ղեկավարին:

12. Գործակալության պետը՝

ա) ղեկավարում է գործակալության ընթացիկ գործունեությունը, պատասխանատու է գործակալության առջև դրված խնդիրների ու գործառույթների իրականացման համար.

բ) օրենքով, այլ իրավական ակտերով և սույն կանոնադրությամբ նախատեսված գործունեության բնագավառի, նպատակների և խնդիրների վերաբերյալ առաջարկություններ է ներկայացնում նախարարին կամ նրա համապատասխան տեղակալին.

գ) իր իրավասության սահմաններում արձակում է կարգադրություններ և տալիս ցուցումներ, առանց լիազորագրի հանդես է գալիս Հայաստանի Հանրապետության և գործակալության անունից, ինչպես նաև տալիս է գործակալության անունից հանդես գալու լիազորագրեր, այդ թվում՝ նաև վերալիազորման իրավունքով լիազորագրեր.

դ) իր իրավասության սահմաններում նախարարության աշխատակազմի ղեկավարին ներկայացնում է առաջարկություններ գործակալության աշխատողների նկատմամբ խրախուսանքի կամ կարգապահական տույժի միջոցների կիրառման վերաբերյալ.

ե) նախարարին կամ նրա համապատասխան տեղակալին պարբերաբար ներկայացնում է տեղեկատվություն գործակալության կողմից իրականացվող աշխատանքների ընթացքի մասին.

զ) ապահովում է նախարարի հրամանների ու ցուցումների, ինչպես նաև նախարարի համապատասխան տեղակալի ցուցումների, հանձնարարականների ու առաջա-դրանքների կատարումը և արդյունքների մասին տեղեկացնում նախարարին կամ նրա համապատասխան տեղակալին.

է) նախարարության կանոնադրությանը և սույն կանոնադրությանը համապատասխան սահմանում է գործակալության կառուցվածքային ստորաբաժանումների իրավասությունները.

ը) կատարում է աշխատանքի Բաշխում իր ենթակաների միջև.

թ) օրենքով և սույն կանոնադրությամբ սահմանված իր լիազորությունների սահմաններում կասեցնում կամ ուժը կորցրած է ճանաչում գործակալության ենթակայությանը հանձնված պետական ոչ առևտրային կազմակերպությունների ղեկավարների՝ Հայաստանի Հանրապետության օրենսդրության պահանջներին հակասող հրամանները, հրահանգները, կարգադրությունները և ցուցումները.

ժ) լսում է գործակալության կառուցվածքային ստորաբաժանումների գործունեության մասին հաշվետվությունները, քննարկում դրանց գործունեության ստուգման արդյունքները.

ժա) իրականացնում է վերահսկողություն գործակալության կառուցվածքային ստորաբաժանումների օգտագործմանը հանձնված պետական սեփականության պահպանության նկատմամբ:

ժբ) նախարարին ներկայացնում է առաջարկություններ գործակալության կառուցվածքի և աշխատողների թվի, ինչպես նաև գործակալության խորհրդակցական մարմիններ ստեղծելու վերաբերյալ:

ժգ) իր լիազորության սահմաններում համագործակցում է պետական կառավարման, տեղական ինքնակառավարման և այլ մարմինների հետ:

ժդ) իրականացնում է օրենքով, այլ իրավական ակտերով և սույն կանոնադրությամբ նախատեսված այլ լիազորություններ:

13. Գործակալության պետի բացակայության կամ պաշտոնական պարտականությունների կատարման անհնարինության դեպքում հարցը կարգավորվում է «Քաղաքացիական ծառայության մասին» Հայաստանի Հանրապետության օրենքի 18-րդ հոդվածին համապատասխան:

## **V. ԳՈՐԾԱԿԱԼՈՒԹՅԱՆ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ**

14. Օրենքով, այլ իրավական ակտերով, նախարարության կանոնադրությամբ և սույն կանոնադրությամբ գործակալությանը վերապահված լիազորությունների լիարժեք և արդյունավետ իրականացումը, ինչպես նաև քաղաքացիական իրավահարաբերություններին նրա մասնակցությունն ապահովում է նախարարության աշխատակազմը:

15. Գործակալությունն ունի կառուցվածքային ստորաբաժանումներ: Իր խնդիրների և գործառնությունների իրականացման ապահովման նպատակով կարող են գործակալության ենթակայությանը հանձնվել պետական ոչ առևտրային կազմակերպություններ, և գործակալությունը կարող է ունենալ թանկարժեք մետաղների, թանկարժեք քարերի ու դրանցից պատրաստված իրերի պահոցներ և ցուցասրահներ:

16. Գործակալության կառուցվածքային ստորաբաժանումների աշխատողները քաղաքացիական ծառայողներ են:

17. Գործակալության վերակազմակերպման և նրա գործունեության դադարեցման կարգն ու պայմանները սահմանվում են օրենքով և այլ իրավական ակտերով:

**Հայաստանի Հանրապետության  
կառավարության աշխատակազմի  
ղեկավար-նախարար**

**Ս. Թովուզյան**

Հավելված N 2  
ՀՀ կառավարության 2003 թվականի  
մայիսի 2-ի N 737-Ն որոշման

**Կ Ա Ռ ՈՒ Ց Վ Ա Ծ Ք**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՖԻՆԱՆՍՆԵՐԻ ՆԱԽԱՐԱՐՈՒԹՅԱՆ «ԹԱՆԿԱՐԺԵՔ  
ՄԵՏԱՂՆԵՐԻ ԵՎ ԹԱՆԿԱՐԺԵՔ ՔԱՐԵՐԻ ՊԵՏԱԿԱՆ ԳԱՆՁԱՐԱՆ» ԳՈՐԾԱԿԱԼՈՒԹՅԱՆ  
(Վերնագիրը փոփ. 15.05.08 N 499- Ն)**

**Կառուցվածքային ստորաբաժանումներ`**



Թանկարժեք մետաղների և թանկարժեք քարերի պետական պահուստների ձևավորման և հաշվառման բաժին

Թանկարժեք մետաղների և թանկարժեք քարերի պետական պահուստների կառավարման բաժին

**Հայաստանի Հանրապետության  
կառավարության աշխատակազմի  
ղեկավար-նախարար**

**Մ. Թովուզյան**